

**Wednesday, February 11, 2026**

**Time - 2:30pm - 2:35pm**

**AKASHVANI AIZAWL**

**REGIONAL NEWS UNIT**

**ASSEMBLY SESSION**

Mizoram Assembly budget session lo awm tur hun hman dan tur duan thar ang chuan Chief Minister Pu Lalduhoma'n February ni 26-ah budget a pharh ang.

Nimin khan Assembly Business Advisory Committee (BAC) chu an chairman Speaker Pu Lalbiakzama hovin a vawi hnih na'n an thukhawm a. He tah hian February ni 5 a budget session hun hman dan tur an lo duan tawh chu tidanglamin Finance changtu Chief Minister Pu Lalduhoma'n 2026-2027 tangka kum atana Mizoram budget a pharh ni tura February ni 19 an lo ruat tawh chu February ni 26 a pharh zawk turin thutlukna an siam a. Chu bakah Assembly inkhawm pawh March ni 12 thleng kalpui tura lo rel tawh chu March ni 16 thleng tur zawka thutlukna siam a ni. He tianga BAC thutkhawm nawn a ngaihna chhan hi Finance department lamin budget pharh tur an la peihfel hman loh avang ni a hriat a ni.

Assembly budget session lo awm tur hi tuna Assembly ding lai, Assembly pakuana thutkhawm vawi 6-na tur a ni a. Kar leh Thawhlelni February ni 17) chawhma dar 10 leh a chanve-ah assembly inkhawm hi tan a ni ang a, kum tina assembly inkhawm hmasa bera tihdan phung pangngai angin larsap Gen. Vijay Kumar Singh chuan House chhungah sorkar hnathawh leh hmachhawpte a sawi ang. Larsap thusawi chungaw lawmthu sawina motion hi a thusawi zawhah putluh a ni ang a, a tuk, Nilaini-ah sawihona hun hman a ni ang a, hemi ni vek hian sawihona hmawr baw a ni ang.

Chief Minister-in budget a pharh hnu hian a kar leh March ni 1 leh ni 2-ah a tlangpui a budget sawihona hun hman a ni ang a. He mi hnu lamah hian BAC in a duan lawk angin minister-te department chanpual enkawlina tur sum ruahman hi a tah tawla sawiho chhoh a ni baw dawn a ni. Tun thlengin House chhunga tawngka a chhan chi zawhna (starred question) 973 leh ziaka chhan chi (unstarred question) 339 a lut tawh a ni.



**BIOMETRIC ENROLMENT**

Mizoramah Myanmar ratlan an lo luh belh mek lai-in chhuak an awm ve reng a, an kutzia leh mitnaute thla lak hna pawh za zela 90 chuang zawhfel a ni tawh.

Home department chhinchhiah danin Myanmar raltlan awm tamna ber Champhai district-ah January thla tawplam khan mi 231 an lo luh belh a, February thla chawlhkar khatna chung khan mi 137 an lo luh belh leh a. Lo luh belhte hi Falam township lama Myanmar sipai leh Chin ralthuam keng pawlte an inkah nasat zual vang ni a hriat a ni. Tun kar kal ta Zirtawpni thleng khan Mizoram pumah Myanmar raltlan 28,355 an awm mek a, an zinga mi 26,381 te kutzia leh mitnaute thla lak (biometric enrolment) hna zawh a ni tawh a, hei hi za zela 93 point 04 lai a

ting tawh a ni. District 4 - Aizawl, Lunglei, Champhai leh Serchhip district-ah te chuan Myanmar raltlante biometric hna hi an zo fel tawh a, Champhai district-ah hian a lo lut tharte pawh chhinchhiah fel vek an ni tawh a ni.

He tih lai hian Siaha, Kolasib, Saitual, Mamit leh Khawzawl district-ah te chuan January thla chho atang khan biometric enrolment hna kal mekah hmasawna a awm lova. Myanmar raltlan tamna ber dawttu Lawngtlai district-ah pawh a district a zau avang leh hmun kilkhawr tlawh pawh harsa a tam avangin hna a kal muang hle a. Tun dinhmunah Lawngtlai district-ah hian Myanmar raltlan 5,034 an awm mek a, January thla a awm zat ai a 983 zeta an kiam tawh hnu-ah pawh biometric enrolment hi za zela 73 point 04 chauh an la zo thei a ni.



## CENSUS

Nakum, 2027 a ram pum huap chhiarpui buatsaih tura lo inpuahchahna atan a chhiarpui buaiputu turte intawhkhawmna chu nimin khan Aizawlah huaihawt a ni.

He intawhkhawmna hi Principal Secretary leh Census of India, 2027 atana State Nodal Officer Pu Sudhir Kumar chuan a kaihruai a. He intawhkhawmna-ah hian an awmna huamchhung theuha Principal Census Officer-a ruat, district zawng zawnga bawrhsapte leh Aizawl Municipal Corporation hnuaiia Municipal Commissioner-te bakah chhiarpui kalpui tura nodal department, General Administration Department (GAD) officer te an tel a ni.

Pu Sudhir Kumar-a chuan India ram chhiarpui chu fiahna hmanga thil ruahmanna, rorel kalhmang siamna leh ram hausakna intluktlang taka semzaina atana ram pum huapa kalpui thin pawimawh tak a ni tih a sawi a. Principal Census Officer-te chu Census Act, 1948 leh Census Rules-in an mawhphurhna a tuksakte taima taka hlenchhuak turin a fuih a. Hna a hun taka dik taka zawh a nih theih na'n district leh local level-a census kaihnawih thil reng reng uluk taka vil a pawimawhzia a sawi bawk a ni.

Deputy Director, Directorate of Census Operations, Mizoram Pu Jamil R. Swer chuan rampum huap chhiarpui atana inbuatsaih dan a sawifiah a. Chhiarpui thawh khatna a in awm zat chhinchhiah leh Housing Operation (HLO) chu Mizoramah April ni 16 atanga May ni 15-ah kalpui a nih tur thu a sawi a. Thawh khatna-a mahni inziahlul theihna (self-enumeration) chu April ni 1 atanga ni 15 chhungin hawn a ni ang tih a sawi bawk a. HLO thawh khatna a zawhna zawh dan tur kalhmang leh digital hmanraw hman turte tarlangin, chhiarpui lo awm tur chu India rama digital mode hlanga Chhiarpui kalpui hmasa ber tur a nih thu a sawi bawk a ni. Census tluang leh hlawhtling taka kalpui a nih theih Department hrang hrang – Rural Development, Forest, Information and Public Relations, leh a dangte – leh khawpui a tualchhung sorkarte nena thawhona a pawimawh thu a sawi bawk a ni.

Directorate of Census Operations a Asst. Director Pu Shivam chuan kalkhawmte chu digital platform hrang hrang thawh dan a hrilhfiyah a, hei hian Census Management and Monitoring System (CMMS) portal, Houselisting and Housing Census (HLBC) system, mobile application leh a thlen ruala hmasawna chhui zuina monitoring dashboard a huam a ni.

GAD Joint Secretary Pu Lalrohlua pawhin inruahmanna kalpui tawhte a tarlang a. Hei hian chhiarpui buaiputu tur ruat, and mawhphurhna turte, district hrang

hranga training kalpui hun turte leh thawh khatna hnu lam kalpui zel tura kal dan turte a huam a ni.

